


Majourau Canounge GEORGE
FELIBRE DE L'AUTAR

Mi Rèire - Vendèmio

Belugueto Radiero



EDITIONS DE LA MÉDITERRANÉE

CANOUNGE

Quouro m'aganto, lou vieiounge,
Vaqui que me noumon canounge,
Aguènt, proche de quaranto an,
Oubra pèr Diéu e li crestian!
Pamens sèmpre siéu lou meme ome,
S'autramen ai que l'on me nome.
Aièr, umble pichot curat,
D'un titre vuei, siéu ounoura.
Coume uno nouvello neissènço,
Me fai esto recounèissènço.
Se me disien: — De qu'as de mai?
— Lou dre de cargo ou camai
Rouge sus negre, au poun d'espino,
Bourda de blanc, mai pas d'ermينو,
Simplamen de pèu de lapin
Sus un subre-pelis di fin;
Pourta barreto dóu flot rouge
Riscant pas de rèndre ferouge;
Riban blu flouca d'uno crous
Especialo e de bon goust;
Agué, dins la grand Baselico,
Mesclant ma voues is angelico,
Un sèti, que lis enemí
Dison qu'es pèr pousqué dourmi
Dóu tèms que se canto o se prego,
Qu'un ouratour seguis sa rego...
Pièi, quand Mounsegnour es soulet,
Ié rèndre tout eisa, moulet.
S'es pas l'àbi que fai lou mounge,
Fai pas, nimai, lou bon canounge:
Ai forço mai l'óubligacioun
De faire ounour à mi founcioun.
Pèr acò faire, Diéu m'ajude,
Car lou santisme sèmpre es rude!

Outobre 1962,

PANEGIRI MANCA

Dins uno acampado noumbrouso,
lou panegiri d'Urban cinq
pèr un saberu de Toulouso
aviéu d'ausi sus un couissin.
Urous d'avanço d'un regale
deguère subran descanta
e faire moun dèu d'aquest chale,
tre que lou vouguère escouta.
La machino dóu naut-parlaire
nous larguè d'abord quàuqui tron
pièi s'apasimè, mai dins l'aire
soun debana noun èro bon.
Venié-ti d'aquéu que parlavo
trop luen, trop proche dóu micro?...
Venié-ti di vouto councavo
que resounavon cop sus cop?...
Toujour ei qu'au bout d'un quart d'ouro,
nautre, qu'ausissian mau parié,
se demandavian quouro, quouro
lou reboulimen finirié!
D'ùni, vesian, sourtien si mostro;
D'ùni s'endourmien, alassa;
D'ùni, revassejant i rostro,
s'esvadavon dins lou passat.
Iéu, me disiéu: Quente daumage
aquest travai e tèms perdu!
L'avisamen, mai pas d'usage,
un grand service aurié rendu!
O! mai d'uno ouro de reloge
l'ouratour debanè soun fiéu;
lou grand discours digne d'eloge
coume forço autre lou perdiéu!
Quand parlaras, tu, fugues sage,
me redisiéu à tout moumen;
de l'ausido assuro-te n'en,
car, enfin, lou pu bèu passage
fuguè quand coumprenguère: — Amen!

Au Palais di Papo,
30 de setèmbre 1962.